

UNHCR ta spera cu por tin bon cooperacion cu gobierno nobo pa mehora procedura di asilo y proteccion pa migrantenan na Aruba

Ayera mainta e organisacion United Nations High Commissioner for Refugees (UNHCR) a reuni cu formadornan Gerlien Croes y Mike Eman como parti di e proceso di formacion di gobierno cu e formadornan ta hibando. Na salida di e reunion Irene van Rij, director di Oficina Nacional Aruba y Corsou, a duna un declaracion y a contesta pregunta di prensa tocante con e reunion a bay y kico ta puntonan cu a ser treci dilanti.



Van Rij a splica cu durante e reunion cu e formadornan a toca temanan relacion cu e situacion di refugiadonan indocumenta, migrantenan na e isla, e trabou cu e organisacion ta haci na Aruba y con nan por sostene gobierno pa busca solucion y beneficia di e situacion.

El a indica cu por logra esaki door di fortifica e procedura di asilo cu ta andando caba, pero cu esaki por ser fortaleci mas aleu tambe, cual ta un di e cosnan mas importante pa por cumpli cu e tratadonan internacional.

El a sigui splica cu ademá cu nan ta kere cu sigur ta importante pa garantisa claridad tocante e hendenan, esta e refugiadonan, cu ta riba e isla, percura pa nan ta regularisa, cu na su turno ta permiti nan contribui na belasting, na AZV, na SVb y por duna un bon aporte na sociedad aki na Aruba.

Manera ta conoci proceso di asilo na Aruba a ricibi un evaluacion negativo di instancianan internacional. Relaciona cu esaki van Rij a splica cu nan ta contento cu nan, hunto cu e gobierno actual a cuminsa cu e Iniciativa di Garantia di Calidad den cual a duna un cantidad di tip y claridad tocante kico ta necesario pa mehora y fortalece e sistema di asilo. “Nos ta spera di por sigui fortalece cu e gobierno nobo e sistema di asilo aki, pues cu en berdad e ta ser haci segun derecho internacional,” el a indica.

Contestando pregunta di prensa tocante kico a bay robes cu e gobierno actual of kico ta e motibo cu tin evaluacion negativo, van Rij a indica cu loke no ta bon y

cu ta un di e motibonan pa e evaluacionnan negativo ta e hecho cu tin un sistema nobo y aworaki no tin suficiente oportunidad pa garantisa cu personanan cu mester proteccion internacional ta ser filtra.

El a agrega cu e ta kere cu den sosten di e Dimas, di e hendenan cu ta procesa peticionnan di asilo, por tin mejoracionnan den e area aki. “Asina tambe ta duna e personanan mes mas confianza den e sistema di asilo y tambe cu e personanan cu netamente mester di proteccion internacional ta aplica p’e,” el a bisa.

El a indica cu na e momentonan aki nan ta tratando cu migracion mixto, pues tin migrantenan, migrantenan economico, como tambe refugiadonan. El a remarca cu ta importante pa esnan cu mester di proteccion internacional realmente ricibi esaki.

Respondiendo e pregunta si en berdad tin proteccion pa migrante aki na Aruba, van Rij a splica cu esaki ta un e aspecto cu sigur por ser fortaleci. El a indica cu actualmente tin un cantidad di solicitante di asilo, pero nan ta wardando ainda nan resultado pa wak si nan por ser reconoci como refugiado of no.

No ta un secreto cu pa algun tempo caba Aruba ta enfrenta un escasez di trahado, sobretodo den e sector turistico, sector horeca. Esaki, van Rij a indica, por hunga un rol tambe den e situacion aki. El a señala cu di un banda tin un necesidad grandi pa mas empleado y na mesun momento, nan ta mira cu tin un cantidad di hende cu ta traha aki informalmente.

“Tur hende sa cu pa sobrevivi na Aruba mester tin un trabou. Pues e mayoria di e hendenan cu ta aki ta trahando y ta importante pa formalisa nan pa asina por tin un aporte. Netamente riba asuntunan social, belasting y cosnan asina. Nos ta mira cu tin hotelnan nobo ta habri cu ta yama pa hende, haci uso di e personanan presente caba riba e isla,” el a splica.

Tocante kico e formadornan a expresa pa loke ta e sector laboral, el a menciona cu ainda e formadornan ta den combersacion cu e diferente sectornan y mirando tambe cu dentro di e sector priva tin necesidad pa trahadonan, cu tin posibilidad pa cooperacionnan.

Contestando pregunta si tin cifra di cuanto refugiado tin na Aruba, el a bisa cu e datonan actual cu e tin ta di e cantidad di Venezolano riba e isla, tanto Venezolanonan documenta, como indocumenta, refugiado, solicitantenan di asilo y migrantenan, ta basa riba informacion di e organisacion Response 4 Venezuela (R4V) cu ta indica cu tin 11.400 Venezolano na e isla.

Pa loke ta con e reunion a bay y e reaccion di e formadornan na informacion cu e UNHCR a trece dilanti, van Rij a indica cu e formadornan a haya cu e reunion tabata interesante y a demostra cu tin posibilidad pa sigui traha hunto y cu tin sosten den seno di sociedad pa sigui discuti e topiconan aki.

Por ultimo van Rij a menciona cu e ta contento di por a informa e formadornan di e trabounan cu UNHCR ta realisa. “Nos ta traha cu solici-



tantenan di asilo, refugiadonan y migrantenan, y tambe cu gobierno pa garantisa cu nos ta cumpli cu tratadonan internacional,” el a remarca. Den un rapport publica aña

pasa den luna di juli, Global Trends 2023 di UNHCR, Aruba ta na posicion number cu e cantidad mas grandi di refugiado per capita na mundo.

1 IN 5 ARE DISPLACED

Relative to their national populations,⁶ the island of Aruba (1 in 5) and Lebanon (1 in 6) hosted the largest number of refugees and other people in need of international protection, followed by Montenegro (1 in 9), Curaçao (1 in 13) and Jordan (1 in 16).⁷

Aruba
1 in 5

Lebanon
1 in 6

Montenegro
1 in 9

Curaçao
1 in 13

Jordan
1 in 16